



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

“HARI KIAMAT – PERSIAPAN MENUJU MAHSYAR”

3 Februari 2023 / 12 Rejab 1444

الْحَمْدُ لِلَّهِ¹ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ، لِيُظْهِرَهُ عَلَى الدِّينِ كُلِّهِ وَكَفَىٰ بِاللَّهِ شَهِيدًا. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ² وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ³ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Jemaah yang dimuliakan,

Marilah kita tingkatkan ketakwaan ke hadrat Allah SWT dengan melaksanakan segala suruhan dan meninggalkan semua larangan Nya; membersihkan jiwa dari segala dosa dan noda, serta sifat-sifat mazmumah yang menghitamkan hati dan merosakkan amal. Mudah-mudahan kita dihimpunkan di hadapan Allah SWT dengan membawa *qalbul salim* (hati yang sejahtera) dan bekalan amal yang diterima. Mimbar hari ini akan memperdengarkan khutbah bertajuk:

“HARI KIAMAT – PERSIAPAN MENUJU MAHSYAR”

Firman Allah SWT ayat 281 surah al-Baqarah:

﴿وَاتَّقُوا يَوْمًا تُرْجَعُونَ فِيهِ إِلَى اللَّهِ ثُمَّ تُوَفَّى كُلُّ نَفْسٍ مَّا كَسَبَتْ وَهُمْ لَا يُظْلَمُونَ ﴿٢٨١﴾﴾

Bermaksud: Dan takutlah diri kamu huru-hara (hari kiamat), yang padanya kamu semua akan dikembalikan kepada Allah. Kemudian setiap orang akan disempurnakan oleh Allah balasan mengikut apa-apa yang telah dilakukannya dan mereka tidak dizalimi.

Para tetamu Allah yang dimuliakan,

Kiamat adalah suatu yang pasti. Mempercayainya merupakan rukun bagi mereka yang beriman kepada Allah SWT dan para rasul Nya. Kiamat ialah hari yang menetapkan segala ciptaan Ilahi dimusnahkan, setiap yang bernyawa dimatikan,

¹ Memuji Allah

² Selawat ke atas Nabi Muhammad SAW

³ Pesan Taqwa



langit dan bumi berkecai, gunung ganang dihancurkan. Pada hari tersebut tiada apa juga yang kekal melainkan zat Allah yang Maha Esa.

Setelah itu semua manusia akan dibangkitkan dan dihimpunkan di Padang Mahsyar, dihitung amalan mereka sewaktu berada di dunia untuk menentukan sama ada mereka akan ditempatkan di syurga atau di neraka. Demikianlah janji Allah SWT; yang menjadikan dunia sebagai tempat persinggahan untuk manusia mentaati Penciptanya, memakmurkan bumi dan mencurahkan bakti sebelum berpindah ke alam akhirat yang kekal selamanya. Inilah akidah Islam yang indah; menawarkan kepercayaan yang mudah difahami, menyedarkan manusia bahawa hidup mempunyai tujuan dan setiap perbuatan akan diadili dan diberi balasan pada hari kiamat.

Terdapat banyak ayat al-Quran mengenai hari kiamat dan suruhan Allah SWT untuk ummah mempersiapkan diri sebelum kedatangannya. Antaranya, ayat 281 surah al-Baqarah yang khatib bacakan pada awal khutbah. Menurut kebanyakan ilmuwan Islam, ayat 281 surah al-Baqarah ialah ayat al-Quran terakhir yang diturunkan kepada Baginda SAW. Meskipun terdapat beberapa pandangan lain berkenaan ayat terakhir yang diturunkan, akan tetapi pandangan paling masyhur dan diterima oleh kebanyakan ulama tafsir seperti yang dinyatakan oleh Ibnu Hajar al-'Asqalani dalam Fathul Bari, ayat 281 surah al-Baqarah ialah ayat terakhir yang diturunkan. Baginda SAW wafat, sembilan hari selepas ayat tersebut diturunkan.

Mukminin Muslimin yang dilimpahi rahmat Ilahi,

Melalui ayat ini terdapat tiga perkara utama:

Pertama: Peringatan takwa terhadap hari kiamat.

Takwa terhadap hari kiamat bermaksud mengambil perhatian, berjaga-jaga dan berhati-hati sebelum kedatangannya dengan melakukan persiapan diri bagi menghadapinya. Menurut tafsir *al-Tahrir Wa al-Tanwir*, kunci untuk selamat dari huru-hara hari kiamat adalah dengan meninggalkan semua larangan Allah SWT dan melakukan segala perintah yang diwajibkan, di samping memperbanyakkan amal soleh. Apabila tiba hari tersebut, semua manusia akan kembali kepada Penciptanya untuk dihisab amalan mereka seperti yang terkandung dalam ayat 6 hingga 8 surah al-Zalzalah:



﴿يَوْمَ يَصْدُرُ النَّاسُ أَشْتَاتًا لِّيُرَوْا أَعْمَالَهُمْ ﴿٦﴾ فَمَنْ يَعْمَلْ مِثْقَالَ ذَرَّةٍ خَيْرًا يَرَهُ ﴿٧﴾ وَمَنْ يَعْمَلْ مِثْقَالَ ذَرَّةٍ

شَرًّا يَرَهُ ﴿٨﴾﴾

Bermaksud: Pada hari itu manusia keluar bertempiran (dari kubur masing-masing) untuk diperlihatkan kepada mereka (balasan) semua perbuatan mereka. Maka sesiapa melakukan kebaikan seberat zarah, nescaya akan dilihatnya (dalam suratan amalannya). Dan sesiapa melakukan kejahatan seberat zarah, nescaya akan dilihatnya (dalam suratan amalannya).

Kedua: Setiap manusia akan disempurnakan balasan amalnya sesuai dengan apa yang diusahakannya.

Ketika manusia dihimpunkan di Mahkamah Rabbuljalil, tiada seorang pun yang akan terlepas dari dihisab. Ketika itu manusia tertanya-tanya apakah nasib yang bakal menimpa diri, sehingga tiba giliran untuk ditimbang catatan amalannya. Ketika itu tidak ada peguam bela yang boleh dilantik untuk membela dirinya, juga tidak ada saksi yang boleh diupah untuk tidak bercakap benar. Apa yang akan dibentangkan di hadapan Allah SWT ialah catatan daripada Raqib dan ‘Atid, malaikat yang ditugaskan mencatat setiap perbuatan manusia semasa hayatnya, termasuk apa yang didengari oleh telinga, apa yang dilihat oleh mata, apa yang dilafazkan oleh mulut, apa yang dikerjakan oleh tangan dan di tempat mana kaki pernah mencecah. Firman Allah SWT:

﴿وَوُضِعَ الْكِتَابُ فَتَرَى الْمُجْرِمِينَ مُشْفِقِينَ مِمَّا فِيهِ وَيَقُولُونَ يَا وَيْلَتَنَا مَالِ هَذَا الْكِتَابِ لَا يُغَادِرُ

صَغِيرَةً وَلَا كَبِيرَةً إِلَّا أَحْصَاهَا وَوَجَدُوا مَا عَمِلُوا حَاضِرًا وَلَا يَظُنُّ رَبُّكَ أَحَدًا ﴿٤٩﴾﴾

Bermaksud: Dan dibentangkan kitab-kitab (catatan amalan), lalu kamu akan melihat orang yang berdosa ketakutan terhadap sesuatu yang (tertulis) di dalamnya dan mereka berkata, “Aduhai, celaka kami! Kitab apakah ini yang tidak meninggalkan (catatan amalan) yang kecil dan tidak (pula) yang besar, melainkan ia mencatat semuanya?” dan mereka mendapati apa-apa yang telah dilakukan mereka ada (tertulis di dalamnya). Dan (ingatlah) Tuhan kamu tidak menzalimi seorang pun. (Surah al-Kahfi ayat 49)

Beruntunglah orang-orang yang berat timbangan amal kebajikannya. Gembiralah mereka yang ketika di dunia sempurna solat lima waktu, yang menunaikan zakat,



memenuhi janji, menyempurnakan amanah, yang gemar meringankan beban orang dalam kesusahan, bersedekah, berbakti kepada kedua-dua ibu bapa, mengeratkan silaturahim, mengajak pada kebaikan dan mencegah kemungkaran, yang melakukan segala suruhan dan meninggalkan segala larangan Allah SWT.

Ketiga: Ketika manusia dihisab, tidak ada seorang pun yang dizalimi.

Hitungan Allah SWT adalah hitungan yang Maha Adil. Setiap kebaikan yang dilakukan sewaktu di dunia akan mendapat ganjaran tanpa ditinggalkan walau sedikit pun, begitu juga setiap kejahatan akan diperlihatkan. Namun rahmat Allah SWT yang maha luas dengan sifat Maha Pemurah lagi Maha Penyayang, menjadikan kebaikan berupaya memadam keburukan seperti firman Nya dalam surah Hud ayat 114:

... إِنَّ الْحَسَنَاتِ يُذْهِبْنَ السَّيِّئَاتِ ذَلِكَ ذِكْرٌ لِلذَّكِرِينَ ﴿١١٤﴾

Bermaksud: “...Sesungguhnya amalan yang baik itu (terutama solat) menghapuskan amalan yang buruk. Itulah peringatan bagi orang yang selalu mengingati Allah”

Para Tetamu Allah yang dimuliakan,

Jadikan dunia sebagai ladang akhirat. Manfaatkan umur dengan memperbanyakkan kebaikan. Mimbar menyenaraikan beberapa peringatan:

Pertama: Hari kiamat adalah benar dan ummah wajib beriman dengannya serta dituntut membuat persiapan diri.

Kedua: Perbanyakkan amal soleh, jauhi amalan syirik dan tinggalkan maksiat. Sentiasa beristighfar, membaca al-Quran dan bersolat sunat taubat setiap hari agar pengakhiran kita sentiasa dalam keadaan bersih daripada dosa dan noda.

Ketiga: Sentiasa memohon maaf dan bersifat pemaaf, menjalin hubungan silaturahim dan menjadi manusia yang bermanfaat pada diri dan masyarakat. Jadikan akhlak mulia sebagai pakaian kerana ia memberatkan amal timbangan sebagaimana sabda Baginda SAW:

مَا مِنْ شَيْءٍ أَثْقَلَ فِي مِيزَانِ الْمُؤْمِنِ يَوْمَ الْقِيَامَةِ مِنْ خُلُقٍ حَسَنٍ وَإِنَّ اللَّهَ لَيُبْغِضُ الْفَاحِشَ
الْبَدِيءَ



Bermaksud: Tidak ada sesuatu yang lebih berat bagi timbangan orang mukmin pada hari akhirat daripada akhlak mulia. Sesungguhnya Allah amat murka kepada orang keji lagi jahat (buruk akhlak).
(Hadis Riwayat Tirmidzi)

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

Khutbah Kedua

الْحَمْدُ لِلَّهِ⁴ حَمْدًا دَائِمًا أَبَدًا. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ⁵ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁶ وَكُونُوا مَعَ الصَّادِقِينَ.

Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁷
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ
وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ

⁴ Memuji Allah

⁵ Selawat ke atas Nabi Muhammad SAW

⁶ Pesan Taqwa

⁷ Ayat Al-Quran



فِي الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ⁸، وَأَصْلِحْ ذَاتَ بَيْنِهِمْ وَأَلِّفْ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ
وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.

Ya Allah! Ya Rabbal 'alamin!, Bimbing kami untuk memanfaatkan dunia ini sebagai ladang akhirat kami. Kurniai kami syurga Mu serta kami berlindung dengan Mu daripada azab api neraka.

Ya Mannan! Ya Razzaq!, berkatilah hamba Mu yang melaksanakan tuntutan zakat, wakaf dan sedekah. Kurniai mereka rezeki yang berlipat ganda, serta sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

Ya Dzal Jalaali wal Ikram!, jadikanlah kami antara hamba Mu yang memelihara amanah. Kuatkan iman kami agar menjauhi perbuatan khianat seperti salah guna harta benda bukan milik kami, memberi atau menerima rasuah, menyalahgunakan kuasa untuk kepentingan diri, serta jauhkan kami termasuk dalam golongan yang mengabaikan tanggungjawab yang diamanahkan.

Ya Maalikal Mulk!, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Malik! Ya Hadi!, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ
فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَى
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.

⁸ Doa untuk Kaum Muslimin